

## **Qilalukkanik qaqortanik qernertanillu illersuineq piniarnerlu pillugit Namminersorlutik Oqartussat nalunaarutaat nr. 7, 29. marts 2011-imeersoq Atuussimasoq (Historisk)**

Piniarneq aallaaniarnerlu pillugit Inatsisartut inatsisaanni nr. 12, 29. oktober 1999-imeersumi, kingullermik Inatsisartut inatsisaata allanngortinnera pillugu Inatsisartut inatsisaatigut nr. 1, 16. maj 2008-imeersumi, § 2, imm. 4, § 8, § 9, imm. 2, § 12, § 13, § 15, imm. 4, § 17, imm. 2 aamma § 18, naapertorlugit aalajangersarneqarput:

### **Kapitali 1**

#### **Atuuffi**

§ 1. Kalaallit Nunaanni qilalukkanik qaqortanik (Delphinapterus leucas) aamma qilalukkanik qernertanik (Monodon monoceros) illersuineq piniarnerlu pillugit nalunaarut.

### **Kapitali 2**

#### **Eqqissisimatitsineq**

§ 2. Qilalukkat qaqortat qernertallu Kalaallit Nunaanni tamarmi eqqissisimatitaapput, § 4-5-imi taaneqartut kisiisa pinnagit.

Imm. 2. Imm. 1 sassanut atuutinngilaq, § 19 naapertorlugu.

### **Kapitali 3**

#### **Pisassiissutinik piniarfinnillu aalajangersaaneq**

§ 3. Naalackersuisut qilalukkanik qaqortanik qernertanillu piniakkamut ataatsimut immikkut ukiumut ataatsimut imaluunniit ukiunut arlalinnut pisassiissutinik aalajangersaassapput. Pisassiissutit aalajangersarneqassapput nunat tamalaat isumaqatigiissutaat, uumassusilinnik misissuisut siunnersuinerat, atuisut ilisimasaat kiisalu Piniarneq pillugu Siunnersuisoqatigiinnik tusarniaasimaneq tunngavigalugit.

Imm. 2. Qilalukkanik qaqortanik qernertanillu piniarnermi ukioq pisassiiffik tassaavoq 1. januaarimiit – 31. decembarimut ullut taaneqartut ilanngullugit.

Imm. 3. Nunap aggornikkaartumik piniakkat killeqarfeqarput, takukkit ilanngussat 1-2.

Imm. 4. Nunap aggornerata killeqarfiusup iluani piniakkanut pisassiissutit, kommunikkaartumik, aqutsivikkaartumik aamma nunaqarfikkaartumik aalajangersaavigineqarsinnaapput.

Imm. 5. Qilalukkanik qaqortanik imaluunniit qilalukkanik qernertanik nunap aggornerata ataatsip killeqarfiata iluani pisassiissutit atunngitsuukkat pisassiissutinut tamarmiusunut nunap aggornerani

pineqartumi ukiup pisassiiffiusup tullianut nuunneqarsinnaapput.

#### Qilalukkanik qaqortanik pisassiissutinik aalajangersaaneq

§ 4. Kalaallit Nunaata Kitaani qaqortanik qilalugaqatigiinnit immikkuq pisassiissutit Naalakkersuisut nunap aggornerinut makkununga aalajangersaassapput, ilanngussaq 1 takuuk.

- 1) Qaanaap aqutsiveqarfia nunaqarfik Savissivik ilanngullugu.
- 2) Kalaallit Nunaata Kitaata sinnera Qaanaap aqutsiveqarfia ilanngunnagu.

Imm. 2. Naalakkersuisut Qimusseriarsuarmi eqqissisimatitsivimmi Immikkoortortaq 2-mi immikkuq qaqortanik pisassiissuteqarsinnaapput, ilanngussaq 1 takuuk.

#### Qilalukkanut qernertanut pisassiissutinik aalajangersaaneq

§ 5. Naalakkersuisut Kangerlussuarmi (Inglefield Bredning) qilalugaqatigiinnit qernertanit immikkuq pisassiissutinik sumiiffinni makkunani aalajangersaassapput, takuuk ilanngussaq 2

- 1) Aqutsiveqarfik Qaanaaq Innaanganermi sumiissutsip  $76^{\circ}\text{N}$ ;  $67^{\circ}\text{V}$ -ip avannaani, nunaqarfik Savissivik ilanngunnagu.
- 2) Kalaallit Nunaata Avannaani Siggup kujataani sumiissutsimi  $71,5^{\circ}\text{N}$ ;  $55,5^{\circ}\text{V}$ -imi, Kalaallit Nunaata Qeqqani aamma Kujataani sumiissutsip  $59,8^{\circ}\text{N}$ ;  $43,9^{\circ}\text{V}$ -ip avannamut kitaani.

Imm. 2. Naalakkersuisut Qimusseriarsuarmi qernertanit qilalugaqatigiinnit immikkuq pisassiissutinik sumiiffinni makkunani aalajangersaassapput, takuuk ilanngussaq 2

- 1) Nunaqarfik Savissivik aamma aqutsiveqarfik Upernavik Innaangarnup kujataani sumiissutsimi  $76^{\circ}\text{N}$ ;  $67^{\circ}\text{V}$ -imi aamma Siggup avannaani sumiissutsimi  $71,5^{\circ}\text{N}$ ;  $55,5^{\circ}\text{V}$ -imi.
- 2) Qimusseriarsuarmi eqqissisimatitsivimmi Immikkoortortaq 2-mi nunaqarfimmut Savissivimmut.

Imm. 3. Naalakkersuisut Tunumi qernertanik qilalugatiigiinnit immikkuq pisassiissutinik sumiiffinni makkunani aalajangersaassapput, takuuk ilanngussaq 2

- 1) Tunumi aqutsiveqarfinni Ittoqqortoormiit aamma Ammassalik kiisalu
- 2) Aqutsiveqarfinni Kommune Kujallermi sumiissutsip  $59,8^{\circ}\text{N}$ ;  $43,9^{\circ}\text{V}$ -ip avannamut kangiani.

### Kapitali 4

#### Tusarniaaneq aamma pisassiissutinik agguaassineq

§ 6. Nunap aggornerisa assigiinngitsut iluini piniakkanut pisassiissutinik agguaassinisaaq kommunikkaartumik aamma aqutsiveqarfikkaartunut tunngassuteqartut annertussusiat Aalisarnermut, Piniarnermut Nunalerinermullu Naalakkersuisumit, Kalaallit Nunaanni Aalisartut Piniartullu Kattuffiannik, Tapertaralugu Piniartartut Aalisartartullu Kattuffiannik (TPAK) aamma KANUKOKA-mik tusarniaareernerup kingornatigut suliarineqassaaq.

Imm. 2. Piniarneq pillugu Siunnersuisoqatigiit pisassiissutinut sinaakkusiussat pillugit tusarniarneqassapput.

§ 7. Aalisarnermut, Piniarnermut Nunalerinermullu Naalakkersuisoq ukiumi pisassiiffiusumi

imaluunniit ukiumi pisassiiffiusumi tulluuttumi kommunimut pisassiissutinik appaasinnaavoq paasineqarpat, qilalukkanik qaortanik imaluunniit qilalukkanik qernertanik aqutsiveqarfimmi unioqqutitsisumik piniartoqartoq. Uiaq pisarineqartoq qilalukkamik qaortamik qilalukkamilluunniit qernertamik inersimasumik ataatsimik amerlassusiliinertut atuuppoq.

§ 8. Piniarnermi ukiumoortumik pisassiissutit tusagassiorfinnut nalunaarutit aamma Namminersorlutik Oqartussat nittartagaat ([www.nanoq.gl](http://www.nanoq.gl)) aqutugalugit tamanut saqqummiunneqassapput.

## Kapitali 5

Piniarsinnaatitaasut, akuersissutinik tunniussineq agguaassinerlu

§ 9. Nunap aggornerini killiliussap iluani Naalakkersuisut pisassiissutinik aalajangersagaasa iluini, qinnuteqarnerup kingornatigut § 4-5-imi akuersissutinik normulersukkanik kommunalbestyrelsi tunniussissaaq.

Imm. 2. Akuersissutinik agguaassinermi peqataasinnaajumalluni piffissami qinnuteqaateqarfiussami aamma piniarnerup nalaani qinnuteqartoq

1) Inuussutissarsiutigalugu piniarnermut allagartamik atuuttumik imaluunniit sunngiffimmi piniarsinnaanermut allagartamik atuuttumik peqassaaq aamma

2) Kommunimi akuersissutip tunniunneqarfigisaani najugaqartutut inuit nalunaarsorsimaffianni nalunaarsorsimassaaq.

Imm. 3. Akuersissummik tunniussinermiut peqatigitillugu kommunalbestyrelsip nalunaarummi ilanngussap 3-ip assinga akuersissummik pissarsisumut tunniutissavaa.

§ 10. Nalunaarummi matumani aalajangersakkat pineqartut naapertorlugit inuit akuersissutinik pigisaqartut kisimik qilalukkanik qernertanik imaluunniit qilalukkanik qaortanik pisaqarsinnaapput.

Imm. 2. Akuersissut inummut atiatigut taasamut taamaallaat atuuppoq allanullu tunniunneqarsinnaanani imaluunniit tuniniarneqassanani.

Imm. 3. Akuersissut ataaseq ukiumi pisassiiffiusumit ataatsimit akuersissutip tunniunneqarfiani, qilalugaqatigiinnit qilalukkamik ataatsimik pisaqarnissamut periarfissiivoq.

§ 11. Kommunilbestyrelsi nunaqarfinni ataasiakkaani aqutsisut, najukkanilu aalisartut piniartullu peqatigiiffii isumasioqatigereerlugit kommunip aamma aqutsiveqarfiit qilalukkanik qaortanik qernertanillu pisassiissutaannik inuussutissarsiutigalugu piniartunut aamma sunngiffimmi piniartartunut agguaassinissaq pillugu piumasaqaatinik, aalajangersaasinnaavoq.

Imm. 2. Sunngiffimmi piniartartut aqutsiviup qilalukkanik qaortanik qernertanillu pisassiissutaasa 0-10 % -iisa akornanni amerlassuseqartunik pisassinneqarsinnaapput.

§ 12. Kommunilbestyrelsi kommunimi ileqqoreqqusaliaq aqutugalugu ataatsimoorluni piniarnissami pisassiissutit pillugit malittarisassanik aalajangersaasinnaavoq. Ataatsimoorluni piniarnermi pisassiissutinik sippuinnginnissaq qulakkeerneqassaaq, takuuk § 10, imm. 3.

Imm. 2. Ataatsimoorluni piniarneq paasineqassaaq, piniartunit ataatsimoorlunit ukunangga inunnit inuussutissarsiutigalugu piniarnermut allagartalinnt, imaluunniit inunnit sunngiffimmi

piniarsinnaanermut allagartalinnit imaluunniit piniarsinnaatitaasunit taakkunanga marlunnit peqataaffigineqartumik aamma ataatsimoorluni piniarnissamut akuersissummik tunineqarsimasunit piniarneq ingerlanneqartoq.

Imm. 3. Kommunalbestyrelsi pisassiissutigineqartunik peqqissaartumik nakkutilliisaaq. Pisassiissutigineqartunik atuineq malittareqqissaarneqassaaq piniarnerlu ingerlaannartumik unitsinneqassalluni, kommunimut pisassiissutit imaluunniit aqutsivimmuut pisassiissutit tamakkerneqarpata.

Imm. 4. Kommunalbestyrelsip kommunimit pisassiissutigineqartut imaluunniit aqutsiveqarfimmuut pisassiissutigineqartut tamakkerlugit pisarineqarpata, Aalisarnermut, Piniarnermut Nunalerinermullu Naalackersuisoqarfimmuut allakkatigut saaffiginnisaaq.

**§ 13.** Kommunalbestyrelsi pisaqarnissamut akuersissutit aaneqarnissaannuut piffissamik killiliisinnaavoq.

Imm. 2. Piniartut akuersissummik tunineqarsimasut akuersissummilli atuisinnaanngitsut imaluunniit atuerusunngitsut, piarnerpaamik akuersissut atorineqanngitsoq akuersissutinik agguaaassisussaatitaasumut utertissavaat.

Imm. 3. Akuersissutit piffissaliussatut killiliussap iluani aaneqanngitsut, sumiiffimmi aqutsiviup iluani pisortatigoortumik utaqqisunut allattorsimaffik naapertorlugu agguaaateqqinneqarsinnaapput.

Imm. 4. Akuersissutit aaneqanngitsut aamma akuersissutit ukiumi akuersissuteqarfiusumi pisassiissutinut sinneruttunik agguaaasseqqinnerup nalaani atorineqanngitsoortut, pissusissamisoortumik agguaaasseqqinnermut atatillugu pisassiissutinut ilanngunneqassapput, tamatumalu kingornatigut siusinnerusukkuut akuersissummik piginnittumit atorineqassanatik. Tamatuma kingornatigut taakku kommunip iluani immikkut piniakkanut pisassiissutit aamma kommunip ileqqoreqqusaliaanut tunngatillu aalajangersakkat naapertorlugit agguaaateqqinneqassapput. Agguaaasseqqinnermut piffissaliusaaq piffissap piniarfiusussap aallartinnginnerani kommunalbestyrelsip nalunaarutigissavaa aamma tamanna akuersissummi takuneqarsinnaassaaq.

Imm. 5. Kommunini aamma sumiiffinni aqutsivinni pineqartuni najukkani aalisartut piniartullu peqatigiiffiinik tusarniaareernerup kingornatigut agguaaasseqqinneq ingerlanneqassaaq.

## **Kapitali 6**

### Piniariaatsit

**§ 14.** Qilalukkanik qaqortanik qernertanillu piniarnermi taamaallaat qoorortuut akuerisaasut minnerpaamik .30-06 (7,62x63 mm)-mik sulloqqortussusillit atorineqassapput. Qoorortuunik eqittaannartakkanik atuineq inunnut inuussutissarsiutigalugu piniarnermut allagartalinnut ajornartitaanngilaq.

Imm. 2. Aallaasit eqqarasuartaatit, qaartartut, qamutillit tuukkartallit aamma timmiarsiutit atornissaat inerteqqutaavoq.

Imm. 3. Ajornartinnagu qilalugaq qaqorta qernertarluunniit toqussutissaanik nangillugu aallaaneqartinnagu naalillugu annaanaveerneqassaaq.

Imm. 4. Qilalukkanik qaqortanik qernertanillu piniarnermut atatillugu taamaallaat ajornartitaanngilaq

qassutinik nigartap tamakkerluni iluatungimigut nerutussusianik minnerpaamik 380 mm-inik atuinissaq, Qaanaap aqutsiveqarfiani kiisalu Tunumi sumiiffinni aqutsiveqarfinni. Qassutit atorneqartut piginnittup aqqanik nalunaaqutserneqarsimassapput, akuttunngitsunillu alakkarneqartarlutik piniarnermilu atorneqareerneramik kingornatigut qaqqinneqassallutik.

Imm. 5. Aqutsiveqarfinni qilalukkanik qaqqortanik imaluunniit qilalukkanik qernertanik piniarnermut atatillugu atorneqarfiini, kommunalbestyrelsi qassusersorluni piniarneq pillugu kommunimi ileqqoreqqusamik suliaqassaaq.

Imm. 6. Qilalukkanik qaqqortanik aamma qernertanik piniarneq Qimusseriarsuarmi eqqissisimatitami Immikkoortoq 2-mi qajaq atorlugu ingerlanneqassaaq. Qaqqortat imaluunniit qernertat aallaaneqartinnagit naalinneqassapput.

**§ 15.** Timmisartut, qulimiguullit qamutillu motorinik ingerlatillit suugaluartulluunniit qilalukkanik qaqqortanik qernertanillu piniarnermut atatillugu imaluunniit piniarfimmut tassangaannillu angallatitut atoqqusaanngillat, taamaattoq takuuk § 19, imm. 5.

**§ 16.** Taamaallaat angallatit, angallatip angissusianut uppernarsaat malillugu 14 meterinik takissuseq tamakkerlugu (t.t.) takitigisut taassuminngaluunniit mikinerusut, qilalukkanik qaqqortanik qernertanilluunniit piniarnermut atatillugu atorneqassapput. Angallatini GR-normulinni 14 meterinik (t.t.) takissusillit taassuminngaluunniit mikinerusuni aalajangersimasumik inuttat angallammik piginnittoq sinnerlugu piniarsinnaapput.

Stk. 2. Qilalukkanik qaqqortanik qernertanilluunniit piniarnermut atatillugu angallatinik anaananik atuinissaq inerteqqutaavoq.

Imm. 3. ”Angallatinik anaananik” paasineqassapput angallatit qanorluunniit angissuseqartut, kalittaatitut imaluunniit, imm. 1 malillugu angallatinit akuerisaasunit qilalukkanik qaqqortanik qernertanilluunniit pisanut atatillugu assartuutitut atorneqartut.

## Ungusineq

**§ 17.** Ungusilluni piniarnerit tamarmik soorlu sinerissamut patugullugit aninaveersitsineq imaluunniit sinerissamut imaluunniit sikup sinaavanut tatisillugit assiinerit inerteqqutaapput.

## Kapitali 7

### Naalackersuisoqarfimmit akuerineqareernerup kingornatigut toqutsineq

**§ 18.** Aalisarnermut, Piniarnermut Nunalerinermullu Naalackersuisoqarfimmit akuerineqareernikkut qilalukkanik qaqqortanik qernertanilluunniit annertuumik ikilerneqarsimasunik, qilalukkanik qaqqortanik qernertanilluunniit aalisarnermut atatillugu qassutinut imaluunniit aalisarnermut atortunut allanut nuiguussimasunik toqutsisoqarsinnaavoq.

Imm. 2. Qilalukkamik qaqqortamik qernertamilluunniit akuerisaasumik pisaqareernerup kingunerisaanik paasineqarpat pisaq nappaammik imaluunniit assigisaanik pissuteqartumik inunnet nerisassatut naleqquttuunngitsoq, tamatuma kingunerisaanik Aalisarnermut, Piniarnermut Nunalerinermullu Naalackersuisoqarfiup pisap toqunneqartutut isigineqarnera akuerisinnaavaa.

Akuersissut atorneqarsimappat taanna atuutiinnassaaq.

Imm. 3. Imm. 1 naapertorlugu piniakkat toqunneqartut najukkami innuttaasunut agguanneqarsinnaapput, pisaq nerisassatut naleqquppat. Saarngit aamma kigitit (tuugaaq) Naalackersuisoqarfiup pigisarai, toqunneqarneratalu kingornatigut kingusinnerpaamik ullut 14-t qaangiunneranni uunga Postboks 269, 3900 Nuuk, nassiunneqassallutik.

## **Kapitali 8**

### Sassat

§ 19. Sassanik naammattuuisoqarpat tamanna najukkami oqartussaasumit Aalisarnermut, Piniarnermut Nunalerinermullu Naalackersuisoqarfimmut uppersarneqassaaq. Naalackersuisoqarfik sassinerup aallartinneqarnissaanut akuersissaaq, Naalackersuisoqarfiup nalilerpagu qilalukkat aniguisinnaanerit ilimananngitsoq. Akuersissut kommunalbestyrelsimut imaluunniit sumiiffimmi aqutsiviusumi najukkani oqartussaasunut nalunaarutigineqassaaq, tamatuma kinguinngua nunaqarfiit illoqarfiillu pineqartut ilisimatinneqassallutik.

Imm. 2. Sassat ima paasineqassaput qilalukkat qaqortat qernertalluunniit sikumi ammalatami mattussaasimasut taamaalillutillu uumallutik nammineerlutik aniguisinnaanngitsut.

Imm. 3. Kikkulluunniit inuussutissarsiutigalugu piniarnermut imaluunniit sunngiffimmi piniarsinnaanerit atuuttumik allagartallit sassinermit peqataasinnaapput. Sassinermit pisat piniartut ataasiakkaat qilalukkanik qaqortanik qernertanilluunniit pisassaannit imaluunniit sumiiffimmi aqutsiviusumi pisassanit ilaatinneqassanngillat.

Imm. 4. Sassinermit pisat ima amerlatigisinnaapput kingusinnerpaamik sassinerup naammassinerata kingornatigut pisat tamakkerlutik qularnaatsumik qimussimik angallanneqarsinnaassallutik.

Imm. 5. Taamaattorli pisuni immikkut ittuni silap sikullu pissusii pissutigalugit pisat tuaviortumik immikkullu ittumik angerlaassorneqartariaqalersillugit sassivimmiit qamuteralaat angerlaassuinermit atorneqarnissaannut kommunalbestyrelsi immikkut akuersissuteqarsinnaavoq.

§ 20. Neqit, mattaat orsullu nalunaaqutsikkat qilalukkallu pitutat piginnittui akuersitinnagit nikisinneqassanngillat, kommunalbestyrelsi imaluunniit sumiiffimmi aqutsiviusumi najukkami oqartussaasut sila pissutigalugu pisat angerlaannissaannut tunngatillugu, piffissamik aalajangiisimanngippata piffissaliussarlu taanna eqqortinneqarsimanngippat.

## **Kapitali 9**

### Pilanneq

§ 21. Qilalugaq nunamut sikumulluunniit qaqiinnavillugu pilanneq aallartinneqassaaq. Nerisassartai atorneqarsinnaasullu allat tamarmik angerlaanneqarlutilluunniit qimatulineqassapput. Pilaffiusimasoq perlukuiarneqarsimassaaq.

Imm. 2. Iliveqqiviit najukkami piniarnermut aalisarnermullu nakkutilliisumut nalunaarutigineqassapput.

Imm. 3. Taamaallaat angallatit, angallatip angissusianut tamakkiisumut uppernarsaat malillugu 14 meterinik t.t.-mik takissusillit taannaluunniit inorlugu angissusillit angallatip nammineq pisaanik pilaffigineqarsinnaapput.

## **Kapitali 10**

### Saniatigut pisat aamma pissaaneq

§ 22. Qilalukkanik qaqortanik imaluunniit qilalukkanik qernertanik saniatigut pisat kommunip imaluunniit sumiiffiup aqutsiviusup pisasaanit ilanngaatigineqassapput.

Imm. 2. Qilalukkanik qaqortanik qernertanilluunniit pissaasoqartillugu sapinngisamik piaarnerpaamik piniarnermik aalisarnermillu nakkutilliisoq tamanna pillugu attavigineqassaaq aamma pissaaneq kommunimi imaluunniit sumiiffimmi aqutsiviusumi pisassiisutinit ilanngaatigineqassaaq.

## **Kapitali 11**

### Tunisinermi piumasagaatit

§ 23. Qilalukkat qaqortat qernertallu pisat tunineqassanngillat kommunimi imaluunniit nunaqarfimmi allaffik akuersissummik naqissusiinikkut ullulerlugu pisamik nalunaarsuereertinnagu, taamaattoq takuuk imm. 3.

Imm. 2. Pisanik taakkualuunniit ilaannik tunisisoqassanngilaq pisisoqaraniluunniit akuersissummik piginnittoq imaluunniit akuersissummik piginnittut akuersissutip assilineranik naqissusiisitseqqaartinnagit, tunisinermut atatillugu qinnuiginninneq malillugu takutissinnaasaminnik. Assilinerani takuneqarsinnaassaaq pisap kommunimi oqartussaasumit nalunaarsorneqarsimanera.

Imm. 3. Taamaattoq kommunip allaffia nunaqarfimmiluunniit allaffiup ammanerisa avataatigut tuniniaaneq aallartinneqarsinnaavoq, allaffik ammarniariartoq nalunaarsuisoqarsinnaappat.

Imm. 4. Qilalukkat qaqortat qernertalluunniit unioqqutitsinikkut pisarineqarsimasut mattaannik, neqaannik aamma kigutaannik (tuugaavinik) pisineq imaluunniit pissarsineq inerteqqutaavoq.

### Tunisineq

§ 24. Qilalukkat qaqortat qernertallu neqaannik, orsuinik mattaannillu tunitsivinnut tuniniaanermi angallatit atorneqassanngillat.

Imm. 2. Tunitsivinnut akuerisaasunut inuussutissarsiutigalugu piniartut, inuussutissarsiutigalugu piniarnermut atuuttumik allagartallit akuersissumillu naqissusersimasumik takutitsinnaasut kisimik pisanik tunisisinnaapput, takuuk § 23, imm. 1 aamma 2.

Imm. 3. Naalackersuisut kommuninut tunisinissamut pisassiissutit aalajangersakkat iluini pisassiissutinik aalajangersaasinnaapput, piniarnermut atatillugu kommuninut pisassiissutinik tunineqarsimasunut.

Imm. 4. Tunisinissamut atatillugu pisassiissutinik aalajangersaasoqarsimatillugu, tunitsiviit ullormut tunisat annertussusiat pillugu paasissutissanik Aalisarnermut, Piniarnermut Nunalerinermullu

Naalackersuisoqarfimmut nassitsissapput, tunisinerup akuerisaanerata atuunnerani.

Imm. 5. Aalisarnermut, Piniarnermut Nunalerinermullu Naalackersuisoqarfiup kommunimi pineqartumi imaluunniit sumiiffimmi aqutsiviusumi tunitsivimmut tunisinerup qaqugu uninnissaa nalunaarutigissavaa.

## Tuniniaaneq

§ 25. Najukkami kalaalimineerniarfinni allatullu tuniniaanerni inuussutissarsiutigalugu piniartunit atuuttumik piniarnermut allagartalinnit pisaqarnissamullu akuersissummik naqissusikkamik peqartunit taamaallaat ingerlanneqarsinnaavoq, takuuk § 23, imm. 1 aamma 2, imaluunniit inunnit tamatumunnga piginnaatitaasunit piumasaqarneq naaportorlugu uppersaammik takutitsisinnaasunit.

Imm. 2. Toqqaannartumik suliffinnut, suliffeqarfinnut neriniartarfinnulluunniit tunisineq inuussutissarsiutigalugu piniartunit atuuttumik inuussutissarsiutigalugu piniarnermut allagartalinnit pisaqarnissamullu akuersissummik naqissusikkamik peqartunit taamaallaat ingerlanneqarsinnaavoq, takuuk § 23, imm. 1 aamma 2, imaluunniit inunnit tamatumunnga piginnaatitaasunit piumasaqarneq naaportorlugu uppersaammik takutitsisinnaasunit.

Imm. 3. Suliffiit, suliffeqarfiit neriniartarfiillu imm. 2-mi taaneqartut qilalukkap qaortap qernertalluunniit neqaa, orsua mattaaluunniit inuussutissarsiutigalugu piniartunit atuuttumik piniarnermut allagartalinnit pisaqarnissamut akuersissummik naqissusikkamik peqartunit, pisiaasimanagera uppersassavaat, takuuk § 23, imm. 1 aamma 2.

Imm. 4. Imm. 3 naaportorlugu uppersaat pineqartoq tassaavoq, pisinerup uppersaat atsiorsimasoq inuussutissarsiutigalugu piniarnermut allagartap piniarsinnaanermullu akuersissutip naqissusikkap assilineranik ilalik.

Imm. 5. Taamaallaat inuit inuussutissarsiutigalugu piniarnermut allagartamik atuuttumik aamma akuersissummik naqissusikkamik peqartut, takuuk § 23, imm. 1 aamma 2, qilalukkat qernertat tuugaavinik imaluunniit qilalukkap qaortap kigutaanik tunisisinnaapput. Allagartaq akuersissutip normutalik tuugaarmut ilivitsumut allunaasartalerlugu ikkunneqassaaq.

## Kapitali 12

### Nalunaaruteqarneq nakkutilliinerlu

§ 26. Qilalukkanik qaortanik qernertanillu pisat, saniatigut pisat pissatallu sapinngisamik piaarnerpaamik kommunimut angerlarsimaffigisamut, illoqarfigisamut imaluunniit nunaqarfimmi allaffimmut nalunaarutigineqassapput. Nalunaaruteqarneq piniartumit pisaqartumit namminermit isumagineqassaaq, sassinermili pisat, inuussutissarsiutigalugu piniartut eqqarsaatigalugit najukkami Aalisartut Piniartullu Peqatigiiffiannit aamma sunngiffimmi piniartartut pineqartillugit kommunalbestyrelsimit/nunaqarfinni aqutsisunit nalunaarutigineqassallutik. Ataatsimoorluni piniarnermi pisat nalunaarutigineqassapput taamaallaat ataatsimoorluni piniarnermut atatillugu aqutsisussatut toqqarneqarsimasumit.

Imm. 2. Nalunaaruteqarnermi immersugassaq nalunaarummut ilanngussap 3-ip assinga atorneqassaaq. Immersugassat kommunip allaffiani nunaqarfimmiluunniit kommunip allaffiani



pineqarsinnaapput. Immersugassat aamma aaneqarsinnaapput Namminersorlutik Oqartussat nittartagaanni uani: [www.nanoq.gl](http://www.nanoq.gl). Qilalukkanut pisanut pissatanullu ataasiakkaanut tamanut immersuiffissaq ataaseq immersorneqassaaq, taamaattorli sassinnermi pisat tamarmik immersuiffissami ataatsimi nalunaarutigineqassallutik. Akuersissutip kommunimut naqissusikkap assilnera pisanik nalunaarutiginninnermi ilanngunneqassaaq.

Imm. 3. Aammattaaq qilalukkanik qaqortanik qernertanillu pisat tamarmik Piniarneq-mi pisanik nalunaarsuiffimmi nalunaarutigineqassapput.

Imm. 4. Kommunalbestyrelsip nalunaarummi ilanngussami 3-mi immersuiffiit kiisalu § 23, imm. 1 naapertorlugu akuersissutit naqissusikkat assingi tiguneqarnerisa kinguinngua piaarnerpaamik Aalisarnermut, Piniarnermut Nunalerinermullu Naalakkersuisoqarfimmut nassiutissavai.

**§ 27.** Inuussutissarsiutigalugu piniarnermut allagartaq atuuttoq imaluunniit sunngiffimmi piniarsinnaanermut allagartaq atuuttoq aamma akuersissut imaluunniit tunisisinnaanermut akuersissut sukkulluunniit politiit, piniarnermik aalisarnermillu nakkutilliisut tamatumunngalu piginnaatitaasut piunasaqarnerisigut tamatigut takutinneqartassaaq.

### **Kapitali 13**

#### Misissugassat nalunaaqutsersuinerlu

**§ 28.** Kinaluunniit qilalukkamik qaqortamik qernertamilluunniit pisaqarsimasoq, pisussaatitaasinnaavoq pisap mattaanik, neqaanik anginngitsumik imaluunniit kigutaata ilaanik misissugassanik kommunip allaffianut tunniussinissamik, tassani pisap suunera, ulloq sumilu pisarineqarsimanera pillugu ilisimatitsissutigalugu. Misissugassat Pinngortitaleriffiup plastikkimik puussarititamut tunniunneqarsimasumut asiunaveersaammik imerpalasortalimmut imaluunniit allakkap puuanut ikineqassapput.

Imm. 2. Misissugassat paasissutissallu tunniunneqartut tignerisa kingornatigut piaartumik kommunip allaffiata Pinngortitaleriffimmut, Box 570, 3900 Nuuk, nassiutissavai.

**§ 29.** Misissugassanik tigusineq, nalunaaqutsersuineq suliallu allat qilalukkanik uumasunik attuumassuteqartut taamaallaat Pinngortitaleriffimmit ingerlanneqarsinnaapput. Allat Aalisarnermut, Piniarnermut Nunalerinermullu Naalakkersuisoqarfimmut akuersissuteqarnissamik qinnuteqaqqaassapput.

### **Kapitali 14**

#### Immikkut akuersissuteqarneq

**§ 30.** Aalisarnermut, Piniarnermut Nunalerinermullu Naalakkersuisoqarfik ilisimatusarnermut atugassanik nalunaarummi matumani aalajangersakkanik immikkut saneqqutsisoqarnissaanut akuersissuteqarsinnaavoq.

## **Kapitel 15**

### Pineqaatissiinerit

§ 31. § 2-mik, § 10-mik, §§-inik 14-25 aamma § 27-imik unioqqutitsinerit akiliisitsinermik aamma pisamik arsaarinnissuteqarnermik Kalaallit Nunaanni pinerluttulerinermik inatsit malillugu pineqaatissiissutaasinnaapput.

Imm. 2. Nalunaarut malillugu kommunimi ileqqoreqqusanik atortussangortinneqarsimasunik unioqqutitsisoqartillugu akiliisitsinermik pisamillu arsaarinnermik pineqaatissiisoqarsinnaavoq.

## **Kapitali 16**

### Atuutilerpera

§ 32. Nalunaarut 1. april 2011 atuutilerpoq. Peqatigitillugu Qilalukkanik qaqortanik qernertanillu piniarneq pillugu Namminersornerullutik Oqartussat nalunaarutaat nr. 2, 12. februar 2004-imeersoq atorunnaarpoq. Taamaakkaluartoq kommunip ileqqoreqqusai nalunaarut malillugu atulersinneqartut allangortinneqarnissamik atorunnaarsinneqarnissamilluunniit tungaannut atuutiinnarallassapput.

Imm. 2. Akuersissutit ukiumut pisassiiffiusumut 2010-2011-imut atatillugu agguaassinermi tunniunneqartut Naalakkersuisoqarfiup imaluunniit kommunip imaluunniit aqutsiviusup akuersissutinik agguaateqqinneqarnissaasa imaluunniit atorunnaarsitsinissaasa tungaannut atuutiinnassapput.

Imm. 3. Sassat pillugit Landsrådip ileqqoreqqusaa 18. januar 1958-imeersoq naapertorlugu kommunini ileqqoreqqusaliat atortussangortinneqarsimasut imaluunniit allakkiat atuutiinnassapput piniarnermut piumasaqaatinik sukumiinerusunik imaqarunik, taamaattorli taakku kingusinnerpaamik ulloq 31. december 2012 atorunnaarsinneqassapput.

Imm. 4. Ileqqoreqqusaliat allat atuutiinnassapput, piniarnermut atatillugu piumasaqaatit aalajangersakkat piumasaqaatinik sakkortuneruppata nutaap atuutilersinneqarnissaata tungaanut. Tamaattorli taakku atorunnaarsinneqassapput kallerriutigineqaqqaarnatik kingusinnerpaamik ulloq 31. december 2012.

Namminersorlutik Oqartussat, ulloq 29. marts 2011

Ane Hansen

/

Jens K. Lyberth

---

Ilanngussaq 1

Ilanngussaq 2

Ilanngussaq 3